



## Adroddiad Arolygu

**Playdays Childcare**

**Playdays Childcare  
Adeiladau'r Goron  
Brodog Lane  
Abergwaun  
SA65 9NT**

**This report is also available in English**

**Mae'r adroddiad hwn hefyd ar gael yn Saesneg**



**Dyddiad y cwblhawyd yr arolygiad**

12/01/2022

**Llywodraeth Cymru** © Hawlfraint y Goron 2022.

Gallwch ddefnyddio ac aildefnyddio'r wybodaeth sy'n ymddangos yn y cyhoeddiad hwn (ac eithrio logos) yn rhad ac am ddim, mewn unrhyw fformat neu gyfrwng, o dan delerau'r Drwydded Llywodraeth Agored. Gallwch weld y Drwydded Llywodraeth Agored ar wefan yr Archifau Gwladol, neu gallwch ysgrifennu at The Information Policy Team, The National Archives, Kew, London, TW9 4DU, neu anfon e-bost at: [psi@nationalarchives.gsi.gov.uk](mailto:psi@nationalarchives.gsi.gov.uk)

Rhaid ichi atgynhychu ein deunydd yn fanwl gywir a pheidio â'i ddefnyddio mewn cyd-destun camarweiniol.

## Ynglŷn â Playdays Childcare

Y math o ofal a ddarperir	Gofal dydd plant Gofal dydd llawn
Unigolyn cofrestredig	Kelly McDonald
Lleoedd cofrestredig	45
Iaith y gwasanaeth	Saesneg
Arolygiad blaenorol gan Arolygiaeth Gofal Cymru	<a href="#">30 Mawrth 2017</a>
A yw hwn yn wasanaeth Dechrau'n Deg?	<a href="#">Nac ydy</a>
A yw'r gwasanaeth hwn yn darparu'r Cynnig Rhagweithiol o ran y Gymraeg?	Nac ydy. Nid yw'r gwasanaeth hwn yn darparu 'Cynnig Rhagweithiol' o ran y Gymraeg. Nid yw'n rhagweld, yn nodi nac yn diwallu anghenion Cymraeg y bobl/plant sy'n defnyddio'r gwasanaeth, neu sy'n bwriadu defnyddio'r gwasanaeth.

## Crynodeb

Mae'r plant yn hapus, yn datgan brwdfrydedd, ac yn mwynhau eu hamser yn y lleoliad. Mae gan y plant ryddid i chwilota eu hystafell chwarae, maent yn dewis pa deganau maent am chwarae â nhw, ac mae ganddynt ymdeimlad cryf o berthyn. Mae'r plant yn mwynhau ystod dda o gyfleoedd diddorol ac yn cael eu hannog i ddatblygu eu sgiliau annibyniaeth. Mae'r plant yn canolbwyntio ar eu chwarae ac yn ymddiddori ynddo ac yn rhannu eu cyffro gyda'r staff.

Mae'r staff gofal yn deall ac yn gweithredu pob un o'r polisïau a gweithdrefnau i hyrwyddo ffyrdd iach o fyw a diogelwch personol. Maent yn dilyn arferion hylendid effeithiol, sydd wedi'u hatgyfnerthu yn sgil y pandemig. Mae'r staff gofal yn gweithredu rheoli ymddygiad cadarnhaol yn gyson ac yn cynllunio, paratoi a chynnal gweithgareddau sy'n addas ar gyfer y plant yn eu gofal.

Mae'r bobl sy'n cynnal y lleoliad yn cynnig amgylchedd sydd yn addas ac yn ddiogel. Maent yn darparu ystod dda o deganau, adnoddau ac offer i'r plant eu defnyddio. Mae'r bobl sy'n cynnal y lleoliad yn sicrhau bod y plant yn defnyddio'r ardal awyr agored mor aml â phosib.

Mae'r bobl sy'n cynnal y lleoliad yn cadw pob un o'u polisïau, cofnodion ac asesiadau risg yn gyfredol. Maent yn pwysu a mesur eu gwasanaeth ac yn cyflwyno adroddiad ansawdd gofal gwerthfawr. Nid yw'r bobl sy'n cynnal y lleoliad yn cynnal gwiriadau addasrwydd digonol bob amser wrth gyflogi gweithwyr newydd.

## Llesiant

Mae gan blant lais cryf. Mae gan blant ryddid i archwilio eu hystafell chwarae a dewis pa deganau y maent am chwarae â hwy a lle maent am chwarae. Er enghraifft, pan ofynnwyd, *“Pwy sydd eisiau mynd allan i chwarae?”*, ymatebodd y mwyafrif *“Fi!”* a dywedodd eraill, *“Dwi eisiau aros tu mewn.”* Ymatebodd staff, *“Mae hynny'n iawn, does dim rhaid i chi fynd allan.”* Mae gan y plant ddewis o ba liw siwt wlyb i'w gwisgo cyn mynd allan i chwarae. Gwnaethant ofyn yn hyderus am fwy o gaws amser cinio a rhoddwyd mwy iddynt.

Mae plant yn hapus yn y lleoliad. Maent yn adnabod y trefniadau arferol yn dda, hyd yn oed gyda'r arferion glanhau a hylendid ychwanegol sy'n gysylltiedig â COVID-19. Maent yn golchi eu dwylo ar amserau addas ac yn helpu i dacluso teganau a'u rhoi i gadw ar ôl gorffen chwarae â nhw. Mae plant iau yn cadw yn agos at staff gofal gan eu bod yn ansicr o'n presenoldeb. Daeth y plant hŷn atom yn hyderus i rannu storïau a dangos eu teganau. Dywedodd rhieni fod eu plant yn mwynhau mynychu'r gwasanaeth yn fawr.

Mae gan y plant ymrwymïadau hoffter da gyda'r staff gofal, ac maent yn chwilio am bobl gyfarwydd y maent yn gwybod y byddant yn barod i'w cynorthwyo. Er enghraifft, eisteddodd un plentyn ar lin un aelod o staff, gan nythu yn ei erbyn. Mae'r plant yn dechrau dysgu am rannu a chymryd eu tro. Mae angen atgoffa rhai plant am bwysigrwydd rhannu offer a bod yn garedig â'i gilydd. Er enghraifft, pan gymerodd un plentyn yr holl uwd a photiau o'r gegin fwd, fel na allai neb arall chwarae â nhw.

Mae plant yn mwynhau chwarae ac yn ddysgwyr chwilfrydig a chynhyrfus. Er enghraifft, roedd y plant yn mwynhau gwneud prydau i ni yn y gegin, gan ganu a sgwrsio wrth iddynt goginio: *“Stwnsh, stwnsh, stwnsh ... cymysgu, cymysgu, cymysgu.”* *“Mae angen i ni gadw'r bwyd yn neis ac yn gynnes.”* Mae plant nad ydyn nhw eisiau cymryd rhan mewn gweithgareddau sy'n cael eu harwain gan oedolion yn gallu dewis yn annibynnol i chwarae ag adnoddau eraill. Roedd bron pob plentyn yn mwynhau ystod dda o gyfleoedd diddorol, gan gymryd rhan mewn gweithgareddau am gyfnodau priodol. Er enghraifft, gwelsom blant yn mwynhau chwarae yn yr ardal adeiladu am gyfnod o 15 munud, yn trwsio trenau a cheir. Roedd plentyn arall yn gosod bloc ar ddoli ac yn dweud, *“Mae'r babi'n chwarae â'r bloc.”*

Mae'r plant yn profi cyfleoedd diddorol sy'n addas i'w datblygiad. Maent yn dangos diddordeb ac yn ymateb i'r gweithgareddau y maent yn cymryd rhan ynddynt. Er enghraifft, defnyddiodd y plant lud i ludo darnau o bapur at ei gilydd i greu Sali Mali. Mae'r plant yn gallu cyrchu cypyrddau storïo yn annibynnol pan fyddant eisiau gweithgaredd. Mae'r plant yn cael eu hannog i ddatblygu sgiliau annibyniaeth, sydd yn eu galluogi i wneud pethau drostynt eu hunain yn llwyddiannus. Er enghraifft, roedd rhai plant yn cau sips eu cotiau eu hunain tra oedd angen rhywfaint o help i ddechrau ar rai eraill.

## Gofal a Datblygiad

Mae gan y staff gofal ddealltwriaeth drwyadl o'u cyfrifoldebau i amddiffyn plant a'u cadw'n ddiogel. Roedd y staff gofal yn dangos dealltwriaeth dda o'u dyletswydd i gadw plant yn ddiogel, ac yn gwybod am bolisi a gweithdrefnau diogelu'r lleoliad pe bai ganddynt unrhyw bryderon. Maent i gyd wedi gosod ap Gweithdrefnau Diogelu Cymru ar eu ffonau. Mae staff gofal yn deall, yn gweithredu ac yn dilyn arferion hylendid effeithiol, ac yn dilyn gweithdrefnau cywir wrth newid clytiau. Mae'r staff gofal yn ymwybodol o hoffterau neu anghenion deietegol y plant ac yn cynnig ystod o fyrbrydau a phrydau bwyd iach i'r plant.

Mae staff gofal profiadol a chymwys yn gofalu am blant yn effeithiol ac yn diwallu eu hanghenion unigol yn dda. Maent yn gweithredu strategaethau rheoli ymddygiad cadarnhaol yn gyson fel bod plant yn gwybod beth yw'r disgwyliadau. Er enghraifft, roedd staff gofal yn ymyrryd yn briodol ac yn dawel pan wrthododd plentyn rannu offer ag eraill. Gwnaethant drafod pwysigrwydd rhannu, gan siarad â'r plentyn ar ei lefel ei hun. Mae'r staff gofal yn siarad â'r plant drwy'r dydd, yn gofyn cwestiynau ac ailadrodd geiriau'r plant, neu wrth fod yn rhan o'u chwarae/gweithgareddau. Er enghraifft, gofynnodd staff gofal gwestiynau am ddiwrnod y plant hŷn yn yr ysgol, gan sgwrsio â nhw wrth iddynt fwyta eu cinio.

Mae'r staff gofal yn gwranddo ar blant ac yn parchu eu barn. Mae'r staff gofal yn rhyngweithio yn gynnes ac yn garedig gyda'r plant. Er enghraifft, maent yn gwranddo'n astud ar anghenion y plant ac yn datblygu dealltwriaeth y plant drwy ofyn cwestiynau a'u hannog mewn modd priodol: *“Wyt ti'n iawn? Oes angen ychydig o help arnat? Mae hynny'n wych, da iawn ... drycha, mi all di ei wneud!”* Mae gan y staff gofal ddealltwriaeth a gwybodaeth dda ynghylch anghenion datblygiadol y plant, gan gynllunio gweithgareddau â'i gilydd a chynnwys syniadau ac awgrymiadau'r plant. Maent yn defnyddio cynlluniau hirdymor a thymor byr sy'n addas i oedran y plant a'u cam datblygu. Maent yn asesu cynnydd y plant ac yn bwydo'r wybodaeth hon i'r cynlluniau gweithgareddau. Mae'r staff gofal yn hyrwyddo iaith gartref y plant, a Saesneg yw'r iaith bennaf yn y lleoliad. Mae'r staff gofal yn siarad â'r plant yn ddwyieithog pan fydd angen.

## Yr Amgylchedd

Mae'r amgylchedd yn ddiogel iawn ac wedi'i gynnal a'i gadw'n dda, y tu fewn a'r tu allan. Mae mynediad i'r lleoliad ac oddi yno yn ddiogel ac mae mesurau diogelwch trwyadl ar waith. Mae'r bobl sy'n cynnal y lleoliad yn sicrhau bod arferion glanhau clir i gynnal dulliau rheoli heintiau. Mae polisiâu newydd a diwygiedig ar waith i leihau heintiau rhag lledaenu oherwydd COVID-19. Mae'r safle yn gynnes ac yn groesawgar, ac wedi'i addurno â gwaith celf y plant. Mae'r bobl sy'n cynnal y lleoliad yn nodi ac yn lleihau peryglon i ddiogelwch plant yn dda iawn. Maent yn cynnal gwiriadau cynnal a chadw a diogelwch trwyadl i gynnal a chadw'r eiddo. Mae'r bobl sy'n cynnal y lleoliad yn cynnal ymarferion tân rheolaidd, yn cofnodi'r manylion, ac yn eu ffeilio'n ddiogel. Yn ystod y pandemig, roedd y bobl sy'n cynnal y lleoliad wedi gwneud gwelliannau, gan gynnwys llawr newydd drwyddo draw ac ail beintio y muriau.

Mae'r lleoliad yn cynnig gofod chwarae digonol i bob ystod oedran yn ogystal ag ardal ar wahân yn yr awyr agored i'r plant iau a'r plant hŷn. Yn ystod y pandemig, mae'r bobl sy'n cynnal y lleoliad wedi adeiladu ystafell ddosbarth awyr agored bren, sy'n dal dŵr, i safon uchel. Mae hyn yn galluogi'r plant i ddewis chwarae a dysgu tu mewn neu yn yr awyr agored. Mae'r gosodiad yn ystafell chwarae'r plant hŷn, â drysau dwbl yn agor allan i'r ardd, yn galluogi plant i symud yn rhydd o'r tu mewn i'r tu allan yn ddiogel, fel y dymunant.

Mae'r bobl sy'n cynnal y lleoliad yn cynnig offer chwarae sy'n briodol o ran oedran ac mae'r plant yn gallu cyrchu'r teganau yn annibynnol, gan eu bod nhw wedi eu storio ar lefel briodol. Maent yn cynnal a chadw'r offer er mwyn sicrhau eu bod yn ddiogel ac yn addas i blant. Mae'r plant yn cymdeithasu yn hapus gan eu bod yn eistedd ar gadeiriau a chadeiriau uchel, ac wrth fyrddau, sy'n briodol i'w hoedrannau. Mae'r bobl sy'n cynnal y lleoliad yn darparu adnoddau da i hybu chwilfrydedd y plant am y gymdeithas ehangach, gan gynnwys ymwybyddiaeth ddiwylliannol. Maent yn sicrhau bod pob plentyn yn gallu cyrchu amrywiaeth eang o deganau ac offer priodol o ansawdd da. Er enghraifft, doliau, teganau adeiladu, ardal chwarae rôl, teganau rhyngweithiol, rhai teganau meddal corfforol bach, a darnau rhydd i annog chwarae dychmygol. Dywedodd y bobl sy'n cynnal y lleoliad eu bod nhw'n defnyddio'r gofod chwarae yn yr awyr agored mor aml â phosib, a bod plant yn gallu cyrchu teganau, adnoddau ac offer sy'n briodol i'w hoedrannau, gan gynnwys chwarae adeiladu, cyfarpar dringo, chwarae rôl, ac ardal teganau i'w gyrru.

## Arweinyddiaeth a Rheolaeth

Mae gan y bobl sy'n cynnal y lleoliad weledigaeth gref ar gyfer y gwasanaeth ac maent yn rhannu hon gydag eraill. Maent yn cynnal a rhannu datganiad o ddiben cynhwysfawr a phroffesiynol cyfredol sy'n adlewyrchu'r gwasanaeth a ddarperir yn gywir ac sy'n mynd y tu hwnt i'r Safonau Gofynnol Cenedlaethol. Maent yn adolygu eu polisïau yn rheolaidd ac yn sicrhau eu bod nhw'n cael eu gweithredu'n ymarferol gan y staff gofal.

Mae'r bobl sy'n cynnal y lleoliad yn cadw'r holl gofnodion gofynnol, gan gynnwys anghenion unigol, contractau a chaniatadau. Mae'r rhain yn gyfuniad o gofnodion ysgrifenedig a gwybodaeth ar yr ap i'r feithrinfa/rhieni. Mae gan y bobl sy'n cynnal y lleoliad ddealltwriaeth dda o'u cyfrifoldebau i hyrwyddo'r Gymraeg.

Mae'r bobl sy'n cynnal y lleoliad yn cynnal adolygiad hunanwerthuso. Maent yn ceisio barn rhieni/gofalwyr ac yn llunio adroddiad sylfaenol ar ansawdd y gofal. Fodd bynnag, nid yw'n cynnwys barn y plant, beth mae'r lleoliad wedi'i wneud yn dda dros y flwyddyn ddiwethaf, a beth yw cynlluniau'r lleoliad ar gyfer y dyfodol.

Mae'r bobl sy'n cynnal y lleoliad yn cynnal gwiriadau addasrwydd ac mae gan y staff gofal i gyd dystysgrif ddilys gan y Gwasanaeth Datgelu a Gwahardd. Fodd bynnag, nid oedd geirdaon ysgrifenedig staff ar gael i'r bobl sy'n cynnal y lleoliad ar gyfer y tair ffeil staff yr edrychwyd arnynt, ac felly mae maes i'w wella wedi'i gyhoeddi. Roedd dogfennau CV staff ar gael, ond nid ydynt yn cael eu cadw yn ffeiliau'r staff. Mae'r broses rheoli perfformiad yn dda ac yn annog staff gofal i fynychu ystod o hyfforddiant ac i gymhwyso'r hyn y maent wedi'i ddysgu. Er enghraifft, mae staff wedi mynychu hyfforddiant diogelu, cymorth cyntaf a hylendid bwyd. Mae'r bobl sy'n cynnal y lleoliad yn cynnal cyfarfodydd goruchwyllo ac arfarnu rheolaidd sydd o safon dda. Maent yn cadw cofnod o amserau mynychu gwirioneddol y plant a phwy oedd yn gofalu amdanynt. Dywedodd y staff fod ganddynt gefnogaeth dda yn eu rolau a bod y rheolwyr yn gweithredu polisi drws agored.

Mae'r bobl sy'n cynnal y lleoliad yn sicrhau bod ganddynt systemau da ar waith i gyfathrebu'n effeithiol â rhieni. Maent yn cadw rhieni wedi'u hysbysu'n dda trwy ap meithrinfa ddiogel, sy'n caniatáu i rieni/gofalwyr weld ffotograffau, cofnodion damweiniau, cofnodion bwyd a chysgu, a thargedau datblygu. Maent hefyd yn defnyddio'r cyfryngau cymdeithasol yn effeithiol i hysbysu rhieni am newidiadau i'r lleoliad neu'r gweithgareddau. Mae'r bobl sy'n cynnal y lleoliad yn sicrhau eu bod nhw'n dilyn gweithdrefnau a phrotocolau yn gyson pan fydd pryderon am gynnydd neu ddatblygiad y plant. Dywedodd rhieni fod y gwasanaeth yn gefnogol ym mhob agwedd ar ddatblygiad eu plant, gan roi'r wybodaeth ddiweddaraf iddynt bob dydd.



## **Argymhellion i fodloni'r Safonau Gofynnol Cenedlaethol**

A1 Cynnwys dogfennau CV staff mewn ffeiliau staff.

A2 Datblygu'r adolygiad ansawdd gofal ymhellach i gynnwys barn y plant.

### Crynodeb o Ddiffyg Cydymffurfio

Statws	Ystyr pob un
<b>Newydd</b>	Nodwyd y diffyg cydymffurfio hwn yn yr arolygiad hwn.
<b>Adolygwyd</b>	Adolygwyd cydymffurfedd yn yr arolygiad hwn ac ni chyflawnwyd. Mae'r dyddiad targed ar gyfer cydymffurfedd yn y dyfodol a bydd yn cael ei brofi yn yr arolygiad nesaf.
<b>Ni chyflawnwyd</b>	Profwyd cydymffurfedd yn yr arolygiad hwn ac ni chafodd ei gyflawni.
<b>Cyflawnwyd</b>	Profwyd cydymffurfedd yn yr arolygiad hwn ac fe'i cyflawnwyd.

Rydym yn ymateb i ddiffyg cydymffurfio â rheoliadau pan fo canlyniadau gwael ar gyfer pobl, a/neu risg i lesiant pobl, yn cael eu nodi drwy ddyroddi Hysbysiad(au) Gweithredu â Blaenoriaeth.

Mae'n rhaid i'r darparwr gymryd camau brys i fynd i'r afael â hyn a gwneud gwelliannau. Pan fydd darparwyr yn methu â chymryd camau blaenoriaeth erbyn y dyddiad targed, mae'n bosibl y byddwn yn uwchgyfeirio'r mater i Banel Gwelliant a Gorfodi.

### Hysbysiad(au) Gweithredu â Blaenoriaeth

Rheoliad	Crynodeb	Statws
Amherthnasol	Ni nodwyd unrhyw ddiffyg cydymffurfio o'r math hwn yn yr arolygiad hwn.	Amherthnasol

Pan fyddwn yn dod o hyd i achosion o ddiffyg cydymffurfio â rheoliadau ond ni nodir unrhyw risg uniongyrchol neu sylweddol ar gyfer pobl sy'n defnyddio'r gwasanaeth, rydym yn amlygu'r rhain fel Meysydd i'w Gwella.

Rydym yn disgwyl y bydd y darparwr yn cymryd camau i gywiro hyn a byddwn yn mynd ar drywydd y camau hyn yn yr arolygiad nesaf. Pan fo'r darparwr wedi methu gwneud y gwelliannau angenrheidiol, byddwn yn uwchgyfeirio'r mater drwy ddyroddi Hysbysiad Gweithredu â Blaenoriaeth.

**Maes/Meysydd i'w Gwella**

Rheoliad	Crynodeb	Statws
28	Nid yw'r darparwr yn cydymffurfio oherwydd, o'r tair ffeil staff yr edrychwyd arnynt, nid oedd gan un unrhyw eirdaon, roedd gan un ddau eirda, ac roedd gan un ffeil staff un geirda.	Wedi cyflawni

**Dyddiad cyhoeddi 20/09/2023**